

03/08/2000

Kepesatan Langkawi bukti kebijaksanaan pemimpin

LANGKAWI, Rabu - Kepesatan pembangunan Langkawi adalah satu lagi contoh kebijaksanaan daya kepemimpinan Perdana Menteri, Datuk Seri Dr Mahathir Mohamad.

Perdana Menteri Bangladesh, Sheikh Hasina Wajed, berkata lawatan ke Langkawi hari ini adalah tepat dan berpendapat lawatannya ke Malaysia tidak lengkap jika tidak melawat pulau yang disifatkan sungguh indah ini.

"Ini menunjukkan hanya pemimpin bermotivasi tinggi saja yang dapat mencapai kejayaan ini," katanya di majlis jamuan tengah hari di Sheraton Perdana, yang diberikan oleh Menteri Besar Kedah, Datuk Seri Syed Razak Syed Zain, hari ini.

Sheikh Hasina tiba di Lapangan Terbang Antarabangsa Langkawi pada jam 11.30 pagi ini untuk lawatan rasmi dua hari. Beliau diberi sambutan bunga manggar setibanya dengan pesawat khas dari Kuala Lumpur.

Ketibaan rombongan beliau disambut Syed Razak, beberapa Exco kerajaan negeri, Ahli Parlimen Langkawi, Datuk Abu Bakar Taib dan Pegawai Daerah Langkawi, Ismail Abdul Hamid.

Antara tempat menarik yang dilawatnya di sini ialah Galeria Perdana di Kilim dan pusat membuat kristal utama negara, LangkawiiCrystaal Sdn Bhd di Jalan Kisap.

Sheikh Hasina berkata, ketika lawatannya ke Malaysia, beliau telah bertukar pendapat dengan Dr Mahathir dan berbincang mengenai usaha untuk meningkatkan hubungan dua hala kedua-dua negara.

"Kami mendapati kedua-dua negara mempunyai pandangan yang sama berhubung beberapa isu utama antarabangsa.

"Malaysia-Bangladesh mempunyai ikatan perhubungan dari segi sejarah, agama dan budaya. Lawatan saya mengukuhkan lagi keyakinan yang kedua-dua negara perlu terus bekerjasama mengekalkan demokrasi ke arah memacu pembangunan," katanya.

Terdahulu, Syed Razak dalam ucapannya, mengajak sektor swasta Bangladesh merebut peluang pelaburan di Kedah yang kini giat membangunkan sektor industri sebagai punca utama pertumbuhan ekonomi.

Menurutnya, kerajaan Kedah meluluskan sejumlah 467 projek industri membabitkan pelaburan bernilai RM20 bilion dengan 368 projek bernilai RM13.4 bilion adalah daripada pelaburan asing, sejak 1991 hingga tahun lalu.

"Kita sedang memulakan era menarik dalam industrialisasi dan cuba menarik pelabur ke pelbagai taman industri terutama di Kulim Hi-Tech Park yang direka bentuk bukan saja untuk menarik industri berteknologi tinggi tetapi untuk menjadikannya sebagai bandar raya sains pada masa depan," katanya.

Beliau berkata, objektif, dasar dan strategi pembangunan Kedah adalah selari dengan kerajaan Pusat.

(END)